


大明集禮


十八




內閣文庫			
函	冊	號	類
二	八〇	〇	漢書
四	九〇	〇	

內閣文庫			
函	冊	號	類
九	八〇	〇	漢書
元	九〇	〇	

內閣文庫			
番號	漢	1900	
冊數	80(18)		
函號	295	24	







大明集禮卷十二

吉禮十二

籍田享先農

總序

祭法曰。王為羣姓立社曰太社。王自為立社曰
 王社。王社亦曰帝社。鄭玄謂王社在籍田之中。
 詩載芟序云。春籍田而祈社是也。又周官籥章
 凡國祈年于田祖。吹豳雅。擊土鼓以樂田畯。鄭
 氏曰。田祖始耕田者。謂神農也。漢立官社。文帝

淺草文庫

令官祠先農。先農即神農也。**晉**武詔復二社。**北**

齊及**隋**又改曰先農。**唐**神龍中禮官祝欽明議

以禮典無先農之文。先農與社本是一神。妄為

改作。請改先農壇為帝社壇。以應禮經王社之

義。至開元定禮。又采**齊****隋**之議。復曰先農。**宋****陳**

祥道曰。先儒謂王社建於藉田。然國語王藉則

司空除壇。農正陳藉禮。而歷代所祭先農而已。

不聞祭社也。詩曰。春藉田而祈社。非謂社稷建

於藉田也。今按祝欽明云。先農即社。陳祥道云。

社自社。先農自先農。藉田所祭乃先農。非社也。

雖其說不同。未知孰是。要之其為重農報本之

義一也。若夫藉田之制。則考於月令。與周官可

見。月令。天子孟春之月。乃擇元辰。親載耒耜。置

之車右。帥公卿諸侯大夫躬耕。藉田千畝於南

郊。冕而朱紘。躬秉耒。天子三推。三公五推。諸侯

九推。反執爵于太寢。三公九卿諸侯大夫皆御。

命曰勞酒。季秋之月。歲帝藉之。收於神倉。地官

內宰詔王后帥六宮之人。生穉穉之種。而獻于

王。甸師掌率其屬而耕耨王藉以時入之。以共
粢盛。其制如此。然享先農之禮與躬耕同日。禮
無明文。惟周語云。農正陳藉禮。而韋昭注謂陳
藉禮者。祭其神。為農祈也。至漢以藉田之日祀
先農。而其禮始著。漢舊儀。春耕藉田。官祠先農。
百官皆從。置藉田令丞。東漢藉田儀。正月始耕。
常以乙日祠先農於田所。先農已享。耕于乙地。
由晉魏以下。至於唐宋。其禮不廢。政和間罷享
先農為中祀。命有司行事。止行親耕之禮。南渡
後復親祠。元雖議耕藉而竟不親行。其祠先農
命有司攝事而已。

國朝親祠躬耕始復遵古禮云。
時日

月令。孟春之月。乃擇元辰。說者曰。元辰。祈穀郊
後吉辰也。十二支謂之辰。郊天是陽。故用辛日。
耕藉是陰。故用亥辰。知用亥者。正月亥為天倉。
以其耕事。故用天倉也。周語。立春之日。農祥晨
正。至二月初吉。王裸鬯而行藉禮。漢文用亥日

耕藉祠先農。後王相承用之。明帝耕以二月。章帝耕以正月乙日。**晉**武帝以正月丁亥。**宋**文帝以正月上辛。後吉亥。享先農親耕。**齊**武帝時王儉以為比來親耕。並用立春後亥日。經無明文。何佟之云。少牢饋食禮。禘太廟用丁亥。鄭玄以不必丁亥。今若不得丁。則用巳亥。辛亥苟有亥馬可也。**梁**初依**宋****齊**禮。以正月用事。天監中以尚書云。以殷仲春。藉田理在建卯。於是改用二月。**唐**用孟春吉亥。**宋**用正月上辛。後亥日。政和

中。議禮局言孟春親耕。下太史局擇日。不必專用吉亥。**元**用孟春吉亥。

國朝以仲春擇吉日行事。
壇壝

周語虢文公云。藉田之制。司空除于藉。**漢**文帝立壇於田所。其制如社之壇。**宋**於宮之辰地八里外。整制千畝。中開阡陌。立先農壇於中阡西陌南。**梁**移藉田于建康北岸。築兆域如南北郊。**齊**作祠壇於陌南阡西。廣輪三十尺。四陞三壝。

四門。又為大營於外。**北齊**立帝社。**唐**高宗改籍田壇為先農壇。神龍初復改先農壇為帝社壇。於壇西立帝稷壇。禮同太社。惟不備方色有異焉。壇高五尺。方五丈。四出陛。其色青。祀前二十日脩畢。**宋**先農壇九尺四十步。飾以青。二壇壇制同社壇。縱廣十步。高五尺。四出陛。其色青。每方開靈星門。

國朝壇在籍田之北。高五尺。闊五丈。四出陛。

配位

漢祠令太社外。又立官社。配以夏禹。立官稷。配以后稷。元始中議以官稷配官社。光武中興。但太社有稷而官社無稷。**北齊**祀先農神農氏於壇上。無配享。**隋**以后稷配。**唐**初於帝社壇西立帝稷壇。至開元定禮。又除帝稷壇。祀先農於壇上。以后稷配。歷**宋****元**至

國朝遂為常典焉。

神席

唐**宋**正配位。皆席以莞。**元**加以褥。

國朝奉主置于案。不用席。

祝冊

唐祀先農正位祝文曰。維某年歲次月朔日子。皇帝某敢昭告于帝神農氏。獻春伊始。東作方興。率由典則。恭祀千畝。謹以制幣犧齊粢盛庶品。肅備常祀。陳其明薦。以后稷配神作主。尚享。后稷氏祝文曰。土膏脉起。爰脩耕藉。恒事于帝神農氏。惟神功叶稼穡。寔允昭配。謹以制幣犧齊粢盛庶品。式陳明薦。侑神作主。尚享。宋祝文

缺。元攝祀正位祝文曰。維年月日皇帝敬遣某官昭告于帝神農氏。夾鍾應律。耕藉以時。順考彝章。載祈農事。謹以制幣牲齊粢盛庶品。用伸明薦。以后稷氏配。尚享。配位祝文曰。日中星鳥。禮重藉田。用薦常事于帝神農氏。惟神之功。粒我烝民。允諧昭配。謹以云云尚享。

國朝洪武二年仲春

皇帝親祠先農祝文曰。惟神生於天地開闢之初。創田器。別嘉種。以肇興農事。古今億兆非此

不生。永為世教。帝王典祀。敬不敢忘。其本庶民。因天下亂。集兵保民者。一紀于茲。荷天地眷佑。海內一家。臨御稱尊。紀綱黎庶。考典崇祀。神載策書。今東作方興。禮宜告祭。謹命太常官築壇於京城之陽。躬率百司詣壇展禮。緬惟神明造化。萬世如斯。仰冀發大古之苗。實初生之粟。為民立命。昭祀無疆。謹以制幣犧齊庶品。肅備常祀。陳其明薦。以后稷氏配神作主。尚享。后稷氏祝文曰。惟土膏脉起。爰脩耕藉。用薦常事于先農之神。惟神功協稼穡。允宜昭配。謹以制幣犧齊粢盛庶品。式陳明薦。作主侑神。尚享。

祭器

唐制。正配位各設犧尊二。象尊二。山罍二。籩豆各十。簠簋各二。登鉶俎各三。**宋**每位著尊二。壺尊二。皆有罍。加勺。罍以為酌尊。太尊二。山尊二。犧尊二。象尊二。皆有罍。加罍設而不酌。籩豆各十有二。簠簋登各一。俎各五。**元**攝祀正位太尊二。著尊二。犧尊二。山罍二。於壇上。象尊二。壺尊

二。山罍二於壇下。配位著尊二。犧尊二。象尊二。山罍二於壇上。壺尊二。山罍二於壇下。籩豆各十。簠簋各二。鉶各三。俎各五。盤各一。

國朝正配位各尊二。籩豆各十。簠簋各二。登鉶俎案各三。

幣

自**唐****宋**以來皆用青幣

牲

周制春藉田祈社稷。牲用太牢。**漢**祀先農以一

太牢。後**魏**用羊一。**宋**初以羊豕。元豐間復加純

色犢。**元**用太牢

國朝用犢一。羊一。豕一。配位同

酒齊

唐正配位犧尊實以醴齊。象尊實以盎齊。山罍

實以清酒。上尊各實明水。玄酒。**宋**著尊實醴齊。

壺尊實盎齊。上尊各實玄酒。設尊並實五齊三

酒

國朝同唐宋

棗盛

唐 簋實以稷。簋實以稻。宋 簋實以稷。簋實以黍。

元 簋實以黍。稷。簋實以稻。梁

國朝同

籩豆之實

唐 籩實以石鹽。乾魚。乾棗。栗。黃。榛子。仁。菱。仁。茨

仁。鹿脯。白餅。黑餅。豆實以韭菹。醯醢。菁菹。鹿醢。

芹菹。兔醢。筍菹。魚醢。脾析菹。豚拍。宋 籩加糗餅

粉。養豆。加飩。食糝。食。元 同唐制

國朝因之

樂章

歷代祠先農與耕藉田皆有樂。唐 祠先農之樂。

降神以角音。奏永之和之樂。以姑洗之均。作文舞

之舞。樂舞三成。登歌。奏肅和之樂。迎俎。奏雍和

之樂。酌獻。奏壽和之樂。飲福同。亞獻。終獻。奏泰

和之樂。武舞之舞。送神。奏永和之樂。宋 仁宗更

定先農樂章。迎神。奏靖安之樂。文舞。儲靈。錫慶

之舞。登歌。奏嘉安之樂。迎俎。奏豐安之樂。酌獻

登歌奏禱安之樂。飲福同亞獻終獻。文舞退。武舞進。奏正安之樂。送神奏靖安之樂。**元**攝祀樂作三成。

國朝迎神奏永和之樂。三成奠幣。奏永和之樂。迎俎。奏雍和之樂。三獻並奏壽和之樂。文德之舞。徹豆。送神並奏永和之樂。望瘞。奏奏和之樂。其藉田之樂。**唐**制。耕訖。太常卿引皇帝入自南門。還大次。樂作。皇帝出自內壝東門。釋鎮圭。執大圭。入次。樂止。**宋**制。皇帝送神畢。還大次。宮架

樂作。出內壝門外。釋大圭。服通天冠。絳紗袍。輦至小次。降輦。至耕藉位。受耒耜。宮架樂作。三推禮畢。帝升觀耕壇。宮架樂作。升自午階。登歌樂作。三公以下至庶人耕畢。北面再拜。皆退復位。皇帝降座。登歌樂作。至壇下。升輦。宮架樂作。還宮。

國朝親耕。用教坊樂。其日附京耆老皆率其子弟。以村社簫鼓集于耕所。而迭奏焉。

冠服

周制天子親耕冕而朱紘。漢以來冕服無文。宋文帝元嘉中親祠躬耕著通天冠青幘青衮佩蒼玉侍祠蕃王以下至六百石皆衣青帷三臺武衛不耕者不改章服。唐乘輿服衮冕侍祠者各服其服如圓丘儀。宋太宗端拱儀祀前一日皇帝服通天冠絳紗袍執圭赴東郊行宮齋宿祀之日服衮冕執鎮圭親享畢詣耕藉位行三推禮禮畢改服通天冠絳紗袍而還。元不親祠其攝祀官並法服。

國朝

皇帝服衮冕十二章。

皇太子侍祠服衮冕九章陪祀官俱法服。

車輅

周藉田天子親載耒耜置之車右。漢制無文。晉武太始四年躬耕御木輅。宋文御耕根三蓋車。駕蒼駟建青旂以享先農而親耕。齊使御史乘馬車載耒耜從五輅。梁制侍中奉耒耜載於象輅以隨木輅之後。唐乘耕根車。宋太宗雍熙儀

乘耕根車。以象輅載耒耜列於仗內御前。在皮軒車後。端拱儀。改乘玉輅。以耕根車載耒耜。仁宗明道中。乘玉輅。適耕所。司農卿以耕根車載耒耜。前玉輅以行。徽宗政和儀。改乘耕根車。而以耒耜載于玉輅。高宗朝。太常議王之五輅。玉輅最貴。耕根一名芒車。所謂農輿。蓋車之無飾者也。南齊藉田。御史乘馬車載耒耜於五輅之後。時以為禮輕。梁更用侍中載象輅。今政和儀。帝御耕根。而耒耜乃載於玉輅。輕重失序矣。請御間。

國朝 因宋制

皇帝乘玉輅。而以耕根載耒耜。

陳設

唐制前祀三日。有司陳設大次御位。及文武官位。太樂令設樂懸。並同圓丘祀天儀。唯樂懸樹路鼓。及為瘞埴于壇北。壬地。設望瘞位於內壇。

東門之內道南為異。又設御耕藉位於外壝南門之外十步所南向。設後耕三公諸王尚書諸卿位於御座東南西向。諸王公尚書卿非耕者位於耕者之東。尚舍設御耒席於三公之北南向。奉禮設司農卿位於御耒席東西向。設廩犧令位於司農之南少退。諸執耒耜者位於公卿耕者之後。非耕者之前。西向。設酒尊之位於壇上。神農氏犧尊二。象尊二。山罍二。於東南隅。后稷氏犧尊二。象尊二。山罍二。在神農酒尊之東。

俱北向。西上。設御洗於壇南。陛東南。亞獻之洗於東陛之南。俱北向。執尊罍篚冪者各位於尊罍篚冪之後。設幣篚於壇上。各於尊坫之所。晡後郊社令帥齋郎以坫罍洗篚冪入。設于位。至祀之日。太史令郊社令升。設神農氏神座於壇上。北方南向。設后稷氏神座於東方。西向。席皆以莞。**宋**前期設御座於藉田思文殿之中南向。設御幄於觀耕壇上。大次於殿上。小次二。一於先農壇午階下。一於觀耕壇酉階下。羣臣次於

門之內外。設饌幔樂舞。前一日。設神農氏位於壇之北方。南向。后稷氏位於東方。西向。席皆以莞。設御位版於壇下。飲福位版於壇上。望瘞位版於子階之西。羣臣位各以其方。司農設御耒耜於南門外。御耕版位於耕藉所。侍耕位於東西階。從耕三公位在東南北。卿諸侯位在其南。皆西向。庶人位在其南十步外。耆老陪耕位又在其南。皆西向。御耒席於三公之北。太僕設御耕牛於御耕位之西。太常設登歌於觀耕壇上。

宮架於庶人耕位之南。耕藉使位於御耕位之東。侍中在其南。司農卿位於侍中之後。藉田令位於司農卿之南。奉青箱官位於司農卿之後。司農少卿位於庶人之前。太社令位於司農之西。太僕卿位於御耕牛之東。畿邑縣令位於庶人之東。執耒耜者位於公卿耕者之後。執畚插者之前。司農設從耕耒耜及牛。各於其位之前。兵部陳仗士及耕耜車於皇城南門之外。
元不親耕。

國朝祀前二日。有司掃除壇上下。灑掃齋舍饌室神厨。設

皇帝大次於外壇之東。設

皇太子次於大次之右。祀前一日。設省牲位於內壇東門之外。設樂懸及協律郎位於壇下之

南。設先農神座於壇上南面。設后稷神座於壇上西面。設

御位於壇下北向。

皇太子位於

御位之東稍後。設望瘞位於壇西南。設典儀御

史四人位於壇下。東西相向。設導駕官太常卿

六人位於

御位之前。東西相向。設傳贊贊引各二人位於

協律郎之南。東西相向。設文武官陪祭位於樂

懸之南。設諸執事官位於陪祭官之左右。設讀

祝位於神位之右。設正配位酒尊於壇上。設

御洗於壇下。又設

御位於耕藉壇上。設

御耒耜二具於壇南。裹以青絹。設戶部尚書進耒耜位於

御耒耜之左。設後耕丞相都督左右丞參政御史大夫中丞侍御治書六部尚書太常卿位於御耒耜之左右。設應天知府上元江寧知縣位於太常卿之後。設庶人耆老位於知縣之後。

齋成

皇帝散齋三日。致齋二日。陪祭執事官各齋成五日。並如圓丘祀天儀

齋宮

宋太宗雍熙四年。定東郊青城齋宮殿門名。前殿曰兩儀。後殿曰延慶。大殿門曰龍德。左掖門曰光天。右掖門曰麗天。東門曰鳳陽。西門曰安福。南門曰祈年。北門曰玄英。大殿東西廊門曰日華。月華。後園五花亭曰會芳。御幄後門曰福慶。哲宗紹聖間。增脩黻麥殿名曰思文。**元**無其制。

國朝

耕所

周制天子耕藉田千畝于南郊。號文公言藉田之制。司空除壇于藉。漢文帝東耕藉田。昭帝幼即位。耕於鉤盾弄田。鉤盾。宦者近署。故往試耕。為戲弄也。後漢明帝東巡。耕於下邳。章帝北巡。耕于懷縣。晉武耕于東郊之南。洛水之北。去宮八里。為千畝之制。宋文帝度宮之辰地。八里之外。整制千畝。中開阡陌。立御耕壇於中阡東陌北。將耕。宿青幕於壇上。梁武普通中。移藉田於

建康北岸。立觀耕臺於壇東。親耕畢。以觀公卿之推反。齊設御耕壇於阡東陌北。隋於東南十四里。啓夏門外。制千畝。唐耕於東郊。不開阡陌。設御耕位於壇南十步。貞觀中。議藉田所在。給事中孔穎達曰。禮天子籍於南郊。諸侯於東郊。晉武時於東南。今於城東。不合古禮。太宗曰。禮緣人情。何常之有。虞書之平秩東作。已在東矣。又乘青輅。載黛耜耜者。所以順於春氣。故知合在東方也。於是遂定。宋初耕於東郊。神宗元豐中。

議以天子為藉於南郊。諸侯為藉於東郊。是為不易之典。而歷世帝王循用東郊之制。乃依古禮度地於京城東南。御耕位在先農壇。壇門東南。築壇高五尺。周圍四十步。四出陛。飾以青。**元**耕藉南郊。

國朝藉田在皇城南門外。

御耕藉位在先農壇東南。高三尺。闊二丈五尺。四出陛。

耒耜牛附

周制。天子親載耒耜。**唐**御耒耜二具。內一具為副。並緇以青。藉席二領。各一丈。御耒耜牛四頭。內二頭副。牛衣以青。三公九卿諸侯耒耜一十五具。牛四十頭。內十頭副。庶人耒耜二十具。畚二具。鍤二具。高宗乾封間。閱耒耜。有雕刻文飾者。謂左右曰。田器農人執之。在於朴素。豈貴文飾乎。命徹之。**宋**御耒耜二。及緇皆飾以青。御耕青牛四。衣以青。如無青牛。以黃牛代。而以青羅夾衣蓋之。後耕官每耒耜用牛二頭。耒耜三十。

牛六十。庶人四十人。並青衣。耒耜四十。牛八十。鍤十。畚二十。**元**不親耕。至元中。定擬御耒耜二。韜以青。其制取合農用。不雕飾。畢日收之。御耒之牛四。并牛衣。三公九卿諸侯耒十有五。耕牛四十。庶人耒耜二十具。鍤一。耕牛四十。

國朝設

御耒耜二具。依農家常用者製造。用青絹包裹。御耕牛四。衣以青衣。後耕官耒耜具牛

頭。庶人

人牛

頭。鍤

畚

耕推之數

周制。天子三推。三公五推。諸侯九推。周語。穉文公曰。王耕一撥。班三之。庶人終于千畝。一撥。一耜之撥也。班。次也。三之者。謂下各三其上也。王一撥。公三。卿九。大夫二十七也。**漢**章帝元和。中耕藉。天子三公九卿諸侯百官以次耕推。數如周法。**宋**文帝親耕。三推三反。王公及諸侯五推五反。孤卿大夫七推七反。士九推九反。藉田令率其屬耕。竟畝。**唐**玄宗開元中。親耕。詔左右曰。

九日集禮
卷十三

大周集禮
卷十三

九

古禮三推。朕今九推。庶九穀之報也。遂進耕五十餘步。盡壠乃止。**宋**太宗端拱中。親耕行三推禮。有司奏禮畢。帝顧侍臣曰。朕志在勸農。恨不終于千畝。豈以三推為限乎。遂耕數十步。侍臣固請乃止。高宗紹興。與親耕至九推。

國朝耕推之數如周法。

穀種

周官內宰。上春詔王后帥六宮之人。生種稑之種而獻之王。先種後熟曰種。後種先熟曰稑。必

使后宮歲種者。以其有繁育之祥也。必生而獻之者。示能育之。使不傷敗。且佐王耕事。供祭祀也。**漢**文帝種百穀萬斛為立藉田食。**宋**文帝時。后率六宮出種。稑之種付藉田令。**北齊**於千畝內種赤梁。白穀。大豆。赤黍。小豆。黑粳。麻子。大麥。小麥。**隋**以青箱播殖九穀。**唐**廢其禮。**宋**青箱之制。以竹木為之。而無蓋。兩頭設臺。襟飾以青色。中分九隔。隔設一種。覆以青綾夾帊。其種用黍。稷。秣。稻。粱。大豆。小豆。大麥。小麥。每色各三斗。**元**

制缺。

國朝

籍田執事

唐皇帝夾侍二人。正衣二人。並合以祀先農壇

充中書門下先奏侍中一人。奉耒耜進耕畢復受奏禮畢

書令一人。侍禮部尚書一人。便取祀先農壇上

行事充司農卿一人。授耒耜於右衛將軍一人。已上

並侍衛太尉司徒司空各一人。行五推禮。九卿九

人行九推禮。諸侯三人。行九推禮。已上並差禮官攝行事。

御史大夫攝其諸侯以正負一品官及嗣王攝禮儀使一人太常卿一人贊禮三公九卿諸侯執牛三十人用六品以下官通事舍人分導文武官就耕所太常帥其屬用庶八二十八以郊社令一人押之太常卿一人率庶人趨耕所博士六人分贊耕種禮司農少卿一人督視庶人終千畝廩犧令二人一人奉耒耜授司農卿一人掌耒耜主藉田縣令一人三公從者各三人九卿諸侯從者各一人以助耕。

勞酒

周制耕藉畢。反執爵於太寢。三公九卿諸侯大夫皆御。命曰勞酒。勞酒。謂既耕而宴。以勞羣臣也。大寢。跽寢。御侍也。周語。豨文公曰。耕畢。膳夫陳享。膳宰監之。膳夫贊王。王歆太牢。班賞之。庶人終食。唐車駕還宮之明日。設會於太極殿。如元會之儀。惟不賀。不上壽。宋雍熙禮。車駕還宮後。擇日大宴。仁宗耕畢。設勞酒於集英殿。

國朝 耕畢

皇帝置酒于大次。後耕大臣咸預。執事百官列坐幕外。光祿徧行酒食。耆老及村社樂藝皆霑賜焉。

國朝

皇帝耕藉親享先農儀注。

時日。太常司行移司天臺。擇仲春吉日行事。齋戒。前期。

皇帝散齋三日。致齋二日。陪享官並齋五日。省牲。前祭二日。設

皇帝大次于外壝東門外南向。省牲位于內壝東門之外南向。前祭一日。

車駕出詣大次。太常卿奏中嚴。

皇帝服皮弁服。太常卿奏外辦。導駕官同太常卿導引。

皇帝詣省牲位。執事者各執方事。廩犧令帥其屬牽牲自東出西過。

御前省訖。牽詣神厨。執事者取毛血實于豆。太常卿奏請詣神厨。導駕官同太常卿導引。

皇帝至神厨。太常卿奏請視鼎鑊。請視滌濯。遂烹牲。導駕官同太常卿導引。

皇帝還大次。

陳設。前祭一日。有司陳設如圖儀。

鑾駕出宮。鹵簿導從同圓丘祀天儀。

正祭。祭日清晨。太常少卿率執事者各實尊罍。簋。簠。豆。登。俎。又實幣于筐。陳于酒尊所。祝版置于

正配神位之右。樂生舞生入就位。太常卿奏請

中嚴。

皇帝服衮冕。太常卿奏外辦。導駕官同太常卿
導引。

皇帝自南門入。至位北向立。

迎神。贊禮唱迎神。協律郎舉麾。俯伏。跪。奏永
和之曲三成。樂止。贊禮唱請行禮。太常卿奏有
司謹具。請行事。太常卿奏鞠躬。拜興。拜興。平身。
皇帝鞠躬。拜興。拜興。平身。贊禮唱

皇太子以下在位官皆再拜。傳贊唱鞠躬。拜興。
拜興。平身。

皇太子以下皆鞠躬。拜興。拜興。平身。樂止。

奠幣。贊禮唱奠幣。執事官捧幣。各立於酒尊
所。太常卿奏請詣盥洗位。導駕官同太常卿導
引。

皇帝詣盥洗位。太常卿贊盥曰。前期齋戒。今晨
奉祭。加其清潔。以對神明。太常卿奏搯圭。

皇帝搯圭。司洗者捧盤進巾。太常卿奏盥手。悅
手。出圭。

皇帝盥手。悅手。出圭。太常卿奏請升壇。贊曰。神明在上。整肅威儀。升自午陛。太常卿奏請詣先農神位前。司幣者捧幣以俟。協律郎舉麾俯伏。跪奏永和之曲。導駕官同太常卿導引。

皇帝至神位前。北向立。太常卿奏跪。搢圭。

皇帝跪。搢圭。司香官舉香。跪進于

皇帝之左。太常卿奏。上香。三上香。

皇帝上香。上香。三上香。司幣者捧幣。跪進于

皇帝之右。

皇帝受幣。奠于先農神位前。太常卿奏。出圭。鞠躬。拜興。拜興。平身。

皇帝出圭。鞠躬。拜興。拜興。平身。太常卿奏。請詣后稷神位前。導駕官同太常卿導引。

皇帝至神位前。東向立。太常卿奏。跪。搢圭。

皇帝跪。搢圭。司香官捧香。跪進于

皇帝之左。太常卿奏。上香。三上香。

皇帝上香。上香。三上香。司幣者捧幣。跪進于

皇帝之右。

皇帝受幣奠于后稷神位前。太常卿奏出圭。鞠躬。拜興。拜興。平身。

皇帝出圭。鞠躬。拜興。拜興。平身。太常卿奏復位。導駕官同太常卿導引。

皇帝復位。

進熟。贊禮唱進俎。太常卿奏請升壇。協律郎俯伏跪。舉麾奏雍和之曲。進俎官舉俎升壇。導駕官同太常卿導引。

皇帝至先農神位前。太常卿奏搢圭。

皇帝搢圭。進俎官以俎進于

皇帝之右。

皇帝以俎奠于先農神位前。太常卿奏出圭。請詣后稷神位前。

皇帝出圭。導駕官同太常卿導引。

皇帝至后稷神位前。進俎官以俎進于

皇帝之右。太常卿奏搢圭。

皇帝搢圭。以俎奠于后稷神位前。太常卿奏出圭。

皇帝出圭。太常卿奏復位。導駕官同太常卿導引。

皇帝復位。

初獻。贊禮唱行初獻禮。太常卿奏行初獻禮。請詣爵洗位。導駕官同太常卿導引。

皇帝至爵洗位。太常卿奏搯圭。

皇帝搯圭。執爵官以爵進。

皇帝受爵。滌爵。拭爵。以爵授執爵官。太常卿奏出圭。

皇帝出圭。太常卿奏請詣酒尊所。導駕官同太常卿導引。

皇帝升壇。至酒尊所。太常卿奏搯圭。

皇帝搯圭。執爵官以爵進。

皇帝執爵。司尊者舉罍。酌醴齊。

皇帝以爵授執爵官。太常卿奏出圭。請詣先農神位前。

皇帝出圭。至神位前。協律郎俛伏跪。舉麾。奏壽和之曲。武功之舞。太常卿奏跪搯圭。

皇帝跪搢圭。司香官捧香跪進于

皇帝之右。太常卿奏上香。上香。三上香。

皇帝上香。上香。三上香。執爵官捧爵跪進于

皇帝之右。

皇帝受爵。太常卿奏祭酒。祭酒。三祭酒。奠爵

皇帝祭酒。祭酒。三祭酒。奠爵。樂舞止。太常卿奏

出圭。

皇帝出圭。讀祝官取祝版於神右跪讀訖。樂舞

止。太常卿奏俯伏。興。平身。稍後。鞠躬拜。興。拜。興。

平身。

皇帝俯伏。興。平身。稍後。鞠躬拜。興。平身。樂

舞止。太常卿奏請詣酒尊所。導駕官同太常卿

導引

皇帝至酒尊所。執爵官以爵進。

皇帝受爵。司尊者舉罍酌醴齊。

皇帝以爵授執爵官。太常卿奏請詣后稷神位

前。導駕官同太常卿導引

皇帝至神位前。太常卿奏跪搢圭。

皇帝跪搢圭。司香官捧香跪進于

皇帝之左。太常卿奏。上香。上香。三上香。

皇帝上香。上香。三上香。執爵官捧爵跪進于

皇帝之右。

皇帝受爵。太常卿奏。祭酒。祭酒。三祭酒。奠爵。

皇帝祭酒。祭酒。三祭酒。奠爵。太常卿奏。出圭。

皇帝出圭。讀祝官取祝版於神位之右。跪讀訖。

太常卿奏。俯伏。興。平身。稍後。鞠躬。拜。興。拜。興。平

身。

皇帝俯伏。興。平身。稍後。鞠躬。拜。興。拜。興。平身。太

常卿奏。請復位。導駕官同太常卿導引。

皇帝復位。

亞獻。贊禮唱行亞獻禮。太常卿奏。行亞獻禮。

請詣爵洗位。導駕官同太常卿導引。

皇帝至爵洗位。太常卿奏。搢圭。

皇帝搢圭。執爵官以爵進。

皇帝受爵。滌爵。拭爵。以爵授執爵官。執爵官又

以爵進。

皇帝受爵。滌爵拭爵。以爵授執爵官。太常卿奏出圭。

皇帝出圭。太常卿奏請詣酒尊所。導駕官同太常卿導引。

皇帝升壇。至酒尊所。太常卿奏搢圭。

皇帝搢圭。執爵官以爵進。

皇帝受爵。司尊者舉幕酌盞齊。

皇帝以爵授執爵官。太常卿奏出圭。請詣先農神位前。協律郎俯伏跪奏壽和之曲。文德之舞。

導駕官同太常卿導引。

皇帝至神位前。太常卿奏跪搢圭。

皇帝跪搢圭。執爵官捧爵跪進于

皇帝之右。

皇帝受爵。太常卿奏祭酒。祭酒。三祭酒。奠爵。

皇帝祭酒。祭酒。三祭酒。奠爵。太常卿奏出圭。俯

伏興。平身稍後。鞠躬。拜興。拜興。平身。

皇帝出圭。俯伏興。平身稍後。鞠躬。拜興。拜興。平

身樂舞止。太常卿奏請詣酒尊所。導駕官同太

常卿導引

皇帝至酒尊所。執爵官以爵進。

皇帝受爵。司尊者舉。酌盞齊。

皇帝以爵授執爵官。太常卿奏請詣后稷神位前。樂舞作。導駕官同太常卿導引。

皇帝至神位前。太常卿奏跪。搢圭。

皇帝跪。搢圭。司香官捧香跪進于

皇帝之左。太常卿奏。上香。上香。三上香。

皇帝上香。上香。三上香。執爵官捧爵跪進于

皇帝之右。

皇帝受爵。太常卿奏。祭酒。祭酒。三祭酒。奠爵。

皇帝祭酒。祭酒。三祭酒。奠爵。太常卿奏。出圭。俯

伏興。平身。稍後。鞠躬。拜興。拜興。平身。

皇帝出圭。俯伏興。平身。稍後。鞠躬。拜興。拜興。平

身。太常卿奏。請復位。導駕官同太常卿導引。

皇帝復位。

終獻。贊禮唱。行終獻禮。並同亞獻儀。

飲福。贊禮唱。飲福受胙。太常卿奏。請詣飲福

位。導駕官同太常卿導引。

皇帝升壇。至飲福位。北向立。太常卿奏鞠躬拜。興。拜。興。平身。

皇帝鞠躬拜。興。拜。興。平身。太常卿奏跪。搯圭。

皇帝跪。搯圭。搯爵官酌福酒。跪進于

皇帝之左。贊曰。惟此酒肴。神之所與。賜以福慶。億兆同霑。

皇帝受福酒。祭酒飲福酒。以爵置于地。捧胙官捧胙。跪進于

皇帝之右。

皇帝受胙。以胙授執事者。執事者跪受胙于

皇帝之右。太常卿奏出圭。俯伏。興。平身。稍後。鞠躬。拜。興。拜。興。平身。

皇帝出圭。俯伏。興。平身。稍後。鞠躬。拜。興。拜。興。平身。太常卿奏請復位。導駕官同太常卿導引。

皇帝復位。

徹豆。贊禮唱徹豆。協律郎俯伏。跪舉麾。奏永

和之曲。掌祭官徹豆。贊禮唱賜胙。太常卿奏

皇帝飲福受胙免拜。贊禮唱

皇太子以下在位官皆再拜。傳贊唱鞠躬拜興。拜興。平身。

皇太子以下皆鞠躬拜興。拜興。平身。

送神。贊禮唱送神。協律郎俯伏跪。舉麾。奏永

和之曲。太常卿奏鞠躬拜興。拜興。平身。

皇帝鞠躬拜興。拜興。平身。贊禮唱

皇太子以下在位官皆再拜。傳贊唱鞠躬拜興。拜興。平身。

皇太子以下皆鞠躬拜興。拜興。平身。贊禮唱祝

人取祝幣。人取幣。詣望座位。讚祝官捧祝。奉幣

官捧幣。掌祭官取饌。及爵酒。詣座次。樂止

望座。贊禮唱望座。太常卿奏請詣望座位。協

律郎俯伏跪。舉麾。奏泰和之曲。導駕官同太常

卿導引

皇帝至望座位。贊禮唱可座。執事者以祝幣牲

體酒饌置坎內。填土至半。太常卿奏請還大次。

皇帝還大次。解嚴。

耕籍 太常卿奏請詣耕籍位。導駕官同太常卿導引。

皇帝至耕籍位。南向立。三公以下及從耕者各就耕位。戶部尚書北面進耒耜。導駕官同太常卿導引。

皇帝秉耒三推訖。戶部尚書跪受耒。太常卿奏請復位。


皇帝復耕籍位。南向坐。三公五推。尚書九卿九推。訖各退就位。太常卿奏禮畢。導駕官同太常卿導引。

卿導引

皇帝還大次。華蓋侍衛如常儀。應天府君及兩縣令率庶人終畝。是日宴勞百官。耆宿於壇旁。鑾駕還宮。

鹵簿導從並如來儀。大樂鼓吹振作。

先農壇




集禮卷十二 三六

大明集禮

卷十二


三六

先農陳設圖




集禮卷上 三

耕籍圖



集禮卷十一 天

山出



先農陳設圖

稷	鹽	菱
梁	蠶	茨
麩	棗	脯
麥	栗	白餅
	榛	黑餅
牲		
燭		

中

左

右

主

祭

守

也

集禮卷三 三

御位

御朱

御朱

都督

參政

尚書

尚書

尚書

樂圖

搏拊
搏拊
歌工
歌工
歌工
歌工
歌工

協律郎

祝

琴琴琴琴琴瑟瑟

鐘

笛笛箎箎塤塤

和笙和笙簫簫鳳笙鳳笙

應鼓

集禮卷三十一

配位同

	祝	黍	禾
先醢	斐俎	稻	肉羹
簋俎	醢醢	大羹	
魚醢	菁俎		牲
脾析	鹿醢		燭
豚拍	芹俎		

舞圖

引舞

舞十

生武	生武	生武	生武
生武	生武	生武	生武
生武	生武	生武	生武
生武	生武	生武	生武
生武	生武	生武	生武
生武	生武	生武	生武
生武	生武	生武	生武
生武	生武	生武	生武

引舞

生文	生文	生文	生文
生文	生文	生文	生文
生文	生文	生文	生文
生文	生文	生文	生文
生文	生文	生文	生文
生文	生文	生文	生文
生文	生文	生文	生文
生文	生文	生文	生文

集禮卷五

搏搏	搏搏
歌工	歌工
歌工	歌工
歌工	歌工
歌工	歌工
歌工	歌工

協律部


歌

琴	琴	琴	琴	琴	琴	琴
---	---	---	---	---	---	---

磬

塤	塤	箎	箎	笛	笛
---	---	---	---	---	---

鳳笙	鳳笙	簫	簫	和笙	和笙
----	----	---	---	----	----



大明集禮卷十二

引舞

卅舞

生武	生武	生武	生武
生武	生武	生武	生武
生武	生武	生武	生武
生武	生武	生武	生武
生武	生武	生武	生武
生武	生武	生武	生武
生武	生武	生武	生武
生武	生武	生武	生武

引舞

生文	生文	生文	生文
生文	生文	生文	生文
生文	生文	生文	生文
生文	生文	生文	生文
生文	生文	生文	生文
生文	生文	生文	生文
生文	生文	生文	生文
生文	生文	生文	生文

